

„et immediate, qua dicit negationem operis immediate et primo Deo debiti, tamen quatenus dicit contemptum mediorum ad nostram salutem destinatorum;“ a qua sententia Wölfliniana nihil differre existimo leges circa Evangelium. Duriora autem sunt, quae sequuntur in argumento II. et III. ubi ipsum „Evangelium dicitur lex, quod obedientia proprie dicta Evangelio praestatur, et Evangelium cum vi obligandi conjunctum.“ Verum Autorem hunc Evangelii vocem in latiori & minus proprio accipere significatu patet ex sequentibus, ubi ad objectionem Amesii, *si Evangelium lex esset, minaretur inobedientibus poenas, quod vero est bonum nuncium*, respondet: „Lusus est in termino cum legem Evangelicam dicimus, intelligimus totum pactum novum Evangelicum, id quod denominatur Evangelium a parte potiori.“ Re ipsa consentit Refutator, quando in Respons. ad arg. II. statuit, obedientiam Evangelicam non esse obedientiam proprie et stricte sic dictam, sed in sensu lato, quo designat quoque admissionem et receptionem voluntatis divinae de Christo revelatae. „Arcte enim inhaeret Evangelio stricte sic dicto, et allegata etiam e Rom. I. 5. *obedientia fidei* egregie confirmat nostras leges circa Evangelium.

### §. XIII.

Tandem ad illam venio controversiam, quae huic opellae atque meditationi occasionem praebuit. Non prolixus ero in recensione ejusdem, cujus Acta Originalia inspicere mihi ante annos viginti licuit, atque excerpta, partim a B. Parente meo Dn. Io. CONR. FEVERLINO Antistite t. t. Nördlingensi, partim a me facta adhuc asservo. Potiores tantum breviter recensibo circumstantias, B. D. IOH. PHIL. TREVNERVS t. t. Senior Ministerii Evangelici Augustani ediderat Augustae a. 1708. Primitias Augustanas, quibus Poenitentiam aliquam, stricte sic dictam,

Hist. Controv.  
Trenner.